

武漢大學校圖書館惠存

姜女詩集

陳璇珍著

# 微塵吟

# 草 吟 塵 微

---

著 珍 璇 陳

行 印 社 版 出 聲 友

# 微塵吟草序

## 序一

詩三百篇，多古人行役之什，發憤之詞；楚騷漢魏以來，又多借物抒情，因言達志；洎乎唐五代兩宋詞人，更感懷家國，憂己傷時；變風變雅，因時而作，豈徒關山風月，而流連於景物也乎！

吾邑陳璇珍女史，以一弱質，萬里從軍，歷粵湘鄂豫諸省，參與徐州蘭封羅王諸役，有微塵吟草一卷，詩詞各半。幽約怨誹之言，低徊要眇之音，往往雜以雄快語，而不拘泥於古，使人誦之，幾疑身在戎馬關山間，壯心奮起，柔情隨生。昔曾文正公云：「聲律

微塵吟草序

二

之道，與兵事相表裏」。微塵吟草，其此意歟！

今春邂逅羊石，以將刊其作索序於予。噫！天下變亂，流離顛沛之際，蒼黃吶喊之間，求諸鬚眉能下馬草露布磨盾爲詩詞者，有幾人哉？今竟見諸女子，不特壓倒古之木蘭紅玉已也。嘻，是足以傳矣！

三十五年秋 蘇廣姚齋猷撰

## 序二

璇珍女士，詠絮逸才，胸懷壯志，離塵邁俗，嫺雅大方，無時下女子惡習。曩從先府君遊，所爲詩詞，清新奇特，不落前人窠臼，飄然有凌雲之氣。

二十七年秋，倭寇南犯，國事日亟，人心惶惑。乃易筭而弁，隻身北上，投商公起予將軍麾下，謀有以自拔而挽救萬一。

由是足跡遍粵湘鄂豫，更參與徐州蘭封羅王諸役。關山戎馬，彈雨槍林，奚囊必俱。有所閱歷，輒盾鼻磨墨，詩以紀之，詞以歌之，胡笳羌笛，鐵撥銅琶，語雜雄快，聲情激楚，名曰微塵吟草。

屬序於予，嗟乎！舉世渾渾，風雲瀕洞，蠻觸之爭，正靡有定。女士歷觀變幻，痛心疾首，故取佛哲之理，以名其作乎？

邇者乘中興之暇，偕其夫婿馬君維岳，歸隱羊石，卜居六榕古剎側。吾知其觀塔影，聽鐘聲，更當新添幾許微塵逸思矣！險韻新聲，其又可限乎哉？！

三十五年秋廣廈黃榮

### 序三

處末世而求能詩詞者，實戛戛其難，况巾幗乎？昔隨園嘗謂方外閨閣，才名每較匹夫易起，要亦視其所詣何如耳！道蘊清照之作，千秋傳誦勿衰，豈偶然哉？！

宗人璇珍女史，曩同學於祝蕙先生之門，致力吟事。抗戰軍興，又隨其外子足跡遍西南，所見廣而所作愈多，於詞尤勝，并顏其集曰微塵吟草，將以付梓，丐予叙之。

予以爲詩固莫盛於唐，詞則莫盛於宋。倘能潛心以探兩代之精髓，必有所得者焉。惜予以衣食奔走，所學日荒也！

今人每以古代詩詞，限於平仄句韻，反不若新體之易爲。夫詩詞固聲韻之學，使無其獨立格律體制，則何以別於文章？故歷千百年而不朽者，此也。

今人不多讀書，徒倡新棄舊，喜易惡難，不亦誣乎？璇珍女史，深察此理，因拉雜敘而歸之，以見處末世而求中樞能詩詞者之尤不易也。

民國三十五年新秋清遠陳居霖



## 序四

余與陳子聲氣有數而未嘗識面也，值同仁集會，因得握手道平生，訂趨向，自人品學術以至文章詞賦無不談，悉同所旨。越數日，余乃訪六榕，循古道，登樓而入，其室穆如清風，四壁琳瑯，作寫並絕，則陳子詞也。跌宕有奇氣，向索全稿，於是出其珠玉曰：微塵吟草使余讀之。詩清婉，風懷旖旎；詞尤峭拔。天才橫溢處，不屑屑於律呂，而格調自高。半爲疆場鼙鼓之音，蓋曩參商將軍戎幕所作者也。將軍馳騁中原，驅除倭虜。陳子揮毫盾鼻，作戰鼓號角諸篇什，以文事濟武備，何其壯也！

迨後河北底定，陳子亦解甲歸。歸而出其所積，一發之於詞，

而其詞乃彌工。方之香南雪北，無多讓焉。然而陳子固不以是爲已足，聞將軼明清而探北宋，以窺詞學之宗。余韙其言而有深感焉。

夫古代閨秀，縱有過人之秉，而囿於見聞，其所爲詩詞，言情以外，無他長。非力不及，時不過耳！今陳子生當進化之世，爲女子者亦得飛躍於金戈鐵馬之場，列名於朝士之位。胸次包羅既富，其發於詞者，自亦有深邃之旨，洪博之音，豈古昔才女所得想見其萬一哉？！

陳子值空前之會，當以空前之成就自期；若僅追踪古人，非區區所敢望於陳子者也。今聞吟草付梓，特書數語以爲勉。質之陳子，意謂何如？丙戌九月望日問鵲述於穗城客次

## 自序

余生也晚，且一介女子，學未湛深，翰墨膚淺，吟詠之工，更何敢言？惟嗜詩詞，乃余天性，溯自束髮受書，課餘閱讀，不覽其他篇籍，祇是沉浸詞林。匪特酷愛古調，尤喜現代新體。提要鉤玄，劄記數千。習染既久，竟爾成癖。

每當遊目騁懷，賞心樂事，或感國家多難，金甌破缺，情不能已，發諸吟詠。聊誌己志，藉留鴻爪。

復得回園黃祝蕙老師及卓右文彭鴻元江完白楊海天黃伯軒張倫蘇世傑陳海天暨姚寶猷黃蔡陳居霖禱問鵬諸詩長不棄，分別題序，感謝奚似！

微塵吟草序

一〇

茲承諸友好慫付梨棗，非敢言工，聊當紀事，並以自勵云爾。  
又蒙張拔君設計封面，黎明君精心編校，附此致謝。

中華民國三十五年冬陳璇珍謹識

# 微塵吟草題詞

題 璇珍女弟微塵吟草

黃祝蕓

錦字瑤箋意共深，碧桐飛上紫鸞吟。  
木蘭古調翻新樣，紅玉英風有嗣音。  
千里關山明月夜，一叢香草美人心。  
鬚眉壓倒休相訝，更向無塵妙處尋。

題微塵吟草

卓右文

大千世界感微塵，翠袖寒生日暮雲。  
欲斬長鯨踏滄海，更隨明月弔湘君。  
牽蘿補屋花應滿，刻燭成篇體自芬。  
試問古今奇女子，幾人書劍賦從軍？！

題微塵吟草

彭鴻元

騷壇法眼悟微塵，吟草清新慧絕倫！絮柳才堪振逸響，木蘭詞合認前身。畫眉更得封侯婿，潘鼻隨參入幕賓。冀著佛頭慙舉筆，瓣香南國有佳人。

乙酉遊粵獲讀微塵吟草率奉一章藉助吟興并乞 指正  
橫刀躍馬氣如何？殺敵平胡志不磨。草檄應憐知己少，論詩總覺遜君多！心懸家國身擐甲，日理軍書夜枕戈。清興肯因征戰減？柳營從未廢吟哦。

皖紆江完白拜稿

奉題

璇珍女詞人微塵吟草

一覽樓主楊海天

寫盡人間絕妙詞，才如江海恨如絲。蛾眉不讓鬚眉勝，一卷詩成紙

貴時。

題微塵吟草

黃伯軒

馬上微塵寶刀間，吟邊意氣尚如山。  
黃花不是尋常物，簾捲西風月一灣。

題微塵吟草

洪陽白湖釣叟少游張倫

一卷詩詞分外妍，新歌舊旆倍纏綿。  
佳人千古多留恨，罷讀微塵錦繡篇。

從來閨閣有詞人，道韞當年迥出塵。  
今識茶陽才女士，渴懷詩思寄璇珍。

### 題微塵吟草

璇珍女士，爲吾友黃先生祝蕚之高足，而同寅馬少將維岳之賢配也。高才壯志，不僅以詩詞鳴。而詩詞固工，有微塵吟草一卷，屬余鈔繕。余喜而諾焉。當時不自知目力之不逮也，比揮毫落紙，乃不能如雲烟，只迷迷茫茫，如五里霧中，勉書六頁，媵四絕句歸之，有負夙諾，慚悚何言！

曾賦木蘭從軍詞，盾餘墨瀋寫新詩，吟懷不忘平胡虜，巾幗英雄絕  
世姿。

強將麾下無弱卒，大匠門中有化工。自是凹園好桃李，更誇夫壻屬  
英雄。

戰伐聲中幾度春，而今江上又風塵。不親桴鼓親吟管，勳業肯輸梁



夫人？

東塗西抹字如鴉，几淨窗明日又斜。一卷詩詞鈔未遍，多慚老眼已生花。

壬午端陽節後三日蘇世傑時客柳州水南邨舍

題璇珍微塵吟草

南海陳海天

吾宗有妹宦邕寧，冰肌慧質天生成。昔年讀書遊太學，詠絮才華噪羊城。多文爲富不自滿，極學凹園求益精。細膩溫柔李清照，間亦規模杜少陵。生當國家多難日，疾惡匡時有赤誠。廁身社黨聲籍甚，東江人識女中英。洎夫黨國真統一，功成長揖事歸耕。不謂蝦夷窺上國，蘆溝構衅陷兩京。同仇敵愾遍巾幗，前線宣慰表同情。肯

辭千辛與萬苦？粵湘鄂豫不計程。時維徐州正會戰，蘭封羅王大鏖  
兵。冰天雪地戰場夜，竟率嬌娃歷柳營。三軍聞風氣益勵，總戎亦  
喜亦心驚。戲與所俘新駿馬，絮之觀戰試平生。自倚紅顏能騎射，  
(借杜句)彈雨叢中並轡行。引得商公總司令爲商震將軍仰天笑，留飲十日壯軍聲  
。歸來奚囊滿詩料，吟成驢背挂銅鈺。我時從役漢江許，黃鶴樓前  
快置觥。酒酣每誦得意句，咳唾隨風一座傾。從茲寇氛更未已，轅  
轍分馳歲遞更。近聞已締同心結，柳州專訪笑相迎。爲爾夫婿真豪  
士，殺賊堅留繼大烹。士別三日當刮目，有作成囊日蒸蒸。顏曰微  
塵編一集，苦索題詩感慙并。嗟我依人徒壓線，廿年報國眼誰青？  
文非隨陸武絳灌，一言庸能倚重輕！多君誑諉情何摯，放歌聊此傲

名卿·於今軟紅亦市利，可愛癡兒獨好名·世上酸鹹有同味，知有  
佳人一辨馨。

調寄攤破浣溪紗奉題璇珍女史微塵吟草

黃 榮

衣浣征塵不計年，撫人楚水與秦煙·洗盡香奩腸斷語，艷飛仙·  
詠絮有才原本色，微塵到處惹人憐！多少興亡家國恨？總淒然！

傲  
塵  
吟  
草  
題  
詞

微塵吟草卷上目錄

浪淘沙	一
長相思	一
點絳脣	一
調笑令	一
憶秦娥	一
蝶戀花	一
菩薩蠻二首	三
浪淘沙二首	三
清平樂	四

微塵吟草卷上目錄

二

南鄉子	四
好事近	五
南鄉子	五
醉花陰	五
采桑子	六
南鄉子	六
一剪梅	七
南鄉子	七
更漏子	七
祝英臺近	八
蘇幕遮	八

唐多令	九
風蝶令	九
虞美人	九
浣溪紗	九
生查子	〇
臨江仙	〇
望江南三首	〇
虞美人	一
生查子	一
一斛珠	二
減字木蘭花	三

十六字令二首	一三
虞美人	一三
減字木蘭花	一四
滿江紅	一四
鷓鴣天	一五
烏夜啼	一五
鷓鴣天	一五
減字木蘭花	一六
好事近	一六
望江南四首	一六
思佳客	一八



三臺令	一八
望江南	一八
臨江仙	一八
鷓鴣天	一九
臨江仙 七首	一九
少年遊	二二
減字木蘭花	二二
阮郎歸	二三
浣溪紗	二三
好事近	二三
南鄉子	二四

點絳脣	二四
浪淘沙 三首	二四
鷓鴣天 二首	二六
點絳脣	二六
虞美人	二七
減字木蘭花	二七
卜算子	二七
點絳脣	二八
惜分飛	二八
臨江仙	二八
喝火令	二九

# 微塵吟草卷上

## 浪淘沙

芳草綠萋萋，繡滿湖堤。青山碧水白雲低。杜宇也知春欲去，一味酸啼。人在小橋西，夢斷歸期。更從何處寄相思？霧恨烟愁飛不盡，一片淒迷！

## 長相思

風淒淒，雨霏霏，陌上楊花不住飛，黃鶯著意啼。鬢絲絲，恨依依，春去春來人未歸，問天天不知！

## 點絳脣

細問東君，已經吹落花多少？數聲啼鳥，却道梅青了。春帶愁來

，偷把人催老！垂楊道，恨烟繚繞，不似先時好。

調笑令

明月明月，使我傷離惜別。樓空何忍團圓？腰瘦誰憐影寒？寒影寒影，往事不堪重省！

憶秦娥

傷離別，鶉聲乍起魂驚絕。魂驚絕，風鈎羅幕，半床殘月。去年湖上清明節，輕舟柳繫歸期說。歸期說，幾行珠淚，鈿釵分擘。

蝶戀花

戲水鴛鴦雙小鳳，見有人來著意清波弄。寶鴨香銷無好夢，卷帘乍覺春心動。一片江山寒霧擁，萬斛相思飛絮難分送。此日情懷誰

與共？我愁自比人愁重！

菩薩蠻

春風吹落花無數，春人寫盡相思句。杜宇一聲聲，燭殘蓮漏清。  
卷帘扶病立，苔露空階濕。曉月向人明，人歸知幾程？！

菩薩蠻

夢迴小院擊朱箔，春風笑我情非昨。雲鬢亂釵橫，娥眉嬾上青。  
酒醒愁未醒，露濕空階冷。柳絮逐花飛，妾身難傍伊。

浪淘沙

昨夜夢魂中，聚首忽忽，依稀未改昔顏容，相對相看無一語，痴恨  
重重！人在小樓東，欲盥還慵，倚欄狼藉數殘紅，花命也如人命

薄，莫怨東風！

浪淘沙

寒食晚來風，掃却芳踪，卷帘偏見鶯啼紅，睡鴨初銷花露冷，月色朦朧。霧擁白雲峰，舊恨重重，鄭仙巖畔水淙淙，落盡相思千點淚，不盡愁悰。

清平樂

此情愁絕，楊柳枝頭月，人未來時圓復缺，窺盡世間緣孽。東風何事蕭蕭，莫非爲惱花嬌？嗚咽水聲橋下，杜鵑同是無聊。

南鄉子

十九年隨軍八十八師

不用話淒涼，駿馬輕車爲底忙？歌舞不忘家國事，何妨，一笑春風

入醉鄉？ 弱質也痴狂，半枕華胥夢許嘗。回首當年多少恨，思量，  
鐵騎無端過洛陽！

### 好事近

烟鎖小朱樓，夢斷鶯兒聲鬧，花落畫檐回舞，惹閒愁多少？相思  
未解寄相思，那管離人老？霏雨昏黃時節，正連天芳草！

### 南鄉子

荔灣游泳

灣水碧如油，出沒身輕一白鷗，最是雨晴風滑處，悠悠，上下閒雲  
逐我游。年少愛風流，今日陽春後日秋，擾擾人間渾似夢，休休  
，斜照江山滿着愁！

### 醉花陰

風急花飛帘不卷，酒惱誰爲遣？聊自理殘雲，鏡裏朱顏，驚却流光換！慵添心字爐香滿，正杜鵑狂喚：底事苦銷魂？南國相思，人比天涯遠！

采桑子

瓊杯未舉心先醉，風力柔柔，柳顰花羞，欸欸鴛鴦弄碧流。夢甜更苦黃鶯語，似訴春愁，難却春愁，久滯相思易白頭。

南鄉子

紫金久社南如樓即景

碧水繞紅牆，十里南風送稻香，朶朶閒雲飛過去，瀟湘，牽惹離人對夕陽。倦鳥返巢忙，青山一抹轉微茫，坐個牧童牛背穩，徜徉，橫笛山歌爲底狂？



## 一 剪梅

帘卷清霜翠幕寒，人倚欄干，月上欄干；相思萬点兩無言，心事頻傳，淚眼頻傳。小院蟲聲四壁喧，似怨孤單，似誚孤單；山山楓葉染朱丹，秋到人間，愁到人間！

## 南鄉子

微雨動輕寒，儘日無心獨倚欄。一片撩情家國恨，江山，烽火迷濛不忍看！消息夢中傳，敵寇焚莊復劫村。百萬災黎成餓殍，人間，血淚滄桑怎得乾？

## 更漏子

柳飛綿，啼杜宇，依舊去年情緒。鶯驟雨，惡東風，滿園飄落紅。

望鄉關，何處是？目斷碧雲無際。凝淚眼，咽孤城，一江羌笛聲。

### 祝英臺近

亂鶯啼，春已去，好夢渾無據。心緒淒其，欹枕聽風雨。斷腸錦繡江山，悠悠千里，却被那胡塵封住。音書阻，此日應解飄零，復仇自相許。馳騁疆場，望繡旗飄處。看他出匣青萍，騰騰飛舞，取敵寇頭顱無數。

### 蘇幕遮

月朦朧，營幕曉，號角悲鳴，寶劍光凝。鄉夢不堪聞鐵鳥，情逐雲飛，壯志吞宵小。旌旗飄，征路渺，柳絮飛花，似我仇多少！誰唱平胡傷國調？掀起春風一片聲繚繞。

## 唐多令

盪漾木蘭舟，閒情似水柔。恨湖山歸計難酬，望斷南天珠海路，烟霧裡，舊詩儔。浪跡寄浮鷗，澆愁愁未休。驚心烽火徧神州，漫道狂濤聲滅急，更擊楫，向中流！

## 風蝶令

廿八年秋夜遊桃花洞

渺渺劉郎去，蕭騷一片生，桃源洞裡聽哀箏，洞外淒涼溪月爲誰明？  
鐵騎驚天地，烟波漾洞庭，消愁羞學避秦人，夜夜江潮澎湃咽孤城！

## 虞美人

芭蕉滴滴窗前雨，望斷西南路。暮雲繚亂萬重山，惱煞倦飛啼鳥噪

人還。無端畫角嚴城動，夜夜思歸夢。醒來風雨漾吳鉤，願借青萍殺盡敵人頭！

浣溪沙

畫角聲聲動壯思，城頭堞上展旌旗，少年鞍馬兩相宜。仗策出關真勇士，揮戈守土是男兒，憑君聽取岳王詞。

生查子

樽前一曲歌，歌裡涵深意。寄語出征人：勿洒傷離淚！東方殺氣騰，曖曖昏千里，壯士尚邊功，不用繫兒女！

臨江仙

重整征鞍臨驛路，黃塵赤日消初，涼風鼓角笑相呼，鋤奸肝膽壯，

殺賊更歡娛。直搗黃龍真不遠，鄉親快貯醪酥，三軍勇氣足平胡，旌旗飄蕩處，狼藉敵頭顱。

### 望江南

營幕靜，悄立數歸鴉，四面邊聲連角起，牽愁何處不思家？心事付流霞！

### 二

擡望眼，搔首一長嗟，百二河山成廢土，胡塵萬里起塵沙，烽火遍天涯！

### 三

相奮起，揮劍斬長蛇，重整乾坤心正切，高歌策杖出懸崖，東海泛

仙槎。

虞美人

狼烟烽火何時了？斷送征夫老。江山自古恨難窮，盡是漫漫黃土垢塵封。酒杯未解愁多少，陣陣歸飛鳥。何當把劍駕長風，殺盡倭奴刀上血鮮紅。

生查子

金鞍一少年，慷慨從軍去，萬里起雄風，塞草含哀意。寸兵斷敵頭，尺組羈倭女，叱咤鬼神驚，彈落渾如雨！

一斛珠

民廿九年夏青山灣軍次偕諸友遊桃源洞

劉郎老去，蕭騷一片無情緒。落花流水歸何處，借問漁人古洞誰爲

主？ 世事滄桑知幾許，殘碑斷碣渾難數。遺愁呼伴興歌舞，添得痴心萬斛傷時苦。

### 減字木蘭花

青山雨歇，疊疊暮雲遮缺月。望斷澄清，濺淚驚心夢不成。鷄聲撩亂，好把乾坤隨轉換。大地光迴，明日羣花燦爛開。

### 十六字令

風，瑟瑟蕭蕭午夜中。驚秋夢，愁緒與誰同？！

### 二

塵，惱煞熙熙擾攘頻。誰個也，從不着浮身！

### 虞美人

琤琮簷溜鏗聲玉，縷縷錐心曲。江山一片入迷濛，往事不堪回首此情中！自傷顛顛蓬廬下，好劍還慵把。浮雲終竟豁然開，不信人間長此便陰霾。

減字木蘭花

蕭蕭瑟瑟，無端又過重陽節。遍地新霜，黃葉隨風飛舞狂。江山非舊，霧罩煙籠愁宇宙。猶有香來，荊棘叢中花自開。

滿江紅

寄宗繩武軍長

夢裏江山，渾不似繁華時節。重回首，汴梁疎柳，洪都新月。世事滄桑何處認，孤鴻飄渺誰人識？記當年虎帳拜群龍，心如鐵。今古恨，長相別。忘不了，腸中熱。縱朝朝煙雨，杜鵑啼血，三尺焦



桐彈不盡，一枝秃筆難伸說。料凌風拔劍挽天河，情激烈。

### 鷓鴣天

余南行而則仁兄亦將他去誠恐吾回桃源不及面矣因以賦別

握手西風淚不乾，人生最苦別離間。雪泥枉自添鴻爪，月落瀟湘咽水寒。歌未歇，酒闌珊，詩箋留取客中看。明朝各自冥飛去，浪跡煙波欲畫難。

### 烏夜啼

送維岳

斜風細雨襲朱扉，送郎時，暗裡一懷心事亂如絲。吟不盡，書還忍，遣花飛，飛到天涯愁處結相思！

### 鷓鴣天

廿七年七月十四日與維岳結禱後一週即話別寫於漢臯

並蒂花開燦爛時，角聲驚起綉羅幃，離懷潭水難爲喻，淚向楊花折

一枝。愁萬斛，酒千卮，個中滋味幾人知？今宵羞對鴛鴦錦，纔賦新歡又別離！

### 減字木蘭花

覆巢飛燕，杳杳天涯人不見。寫盡相思，腸斷斜陽畫角悲。江山破碎，酌酒送春春欲醉。寄語東君，我欲磨刀搏陣雲。

### 好事近

雨後曉寒輕，花外曉鶯啼歇。愁聽城頭鼙鼓，正聲聲淒咽。不堪回首望中原，仇恨織如結。憑得一枝村管，向東風吹徹。

### 望江南

寄商公總司令

分相憶，豫北識公時，躍馬橫戈看草檄，雄風萬里敵魂飛，高唱岳

王詞。

二

分相憶，轉戰考城東，血湧長河殲敵騎，氣冲牛斗壯如虹，相誓飲黃龍。

三

分相憶，最憶是洪都，奪取麒麟峯上月，潯陽江底葬強胡，青史誌雄圖。

四

分相憶，駐馬洞庭西，好讓清波淘敵骨，胡兒斂跡識雄師，得意展旌旗。

思佳客

爲余福定湯良秀結婚而作

並蒂花開錦綉叢，珠簾翠幕護春風，笙簫鐘鼓凝新曲，玉樹交柯滿地紅。車流水，馬游龍，歡聲浮動桂華宮，今宵羨煞邕江上，可喜藍橋路已通。

三臺令

千古風流人物，一生意氣如花，等到三春都盡，天涯雲水其家。

望江南

更漏永，起坐剔殘燈，一片歸心驚客夢，三魂常繞白雲間，臘鼓又闌珊。

臨江仙

珍以事業羈身南北奔馳感天倫聚散無定賦此自遣

自愧長安名利客，輕離輕散尋常。悽涼辜負好風光，一江秋水碧，羞見俏鴛鴦。記得共郎分手處，飛花淚點千行。而今不忍更思量，夢迴歸路遠，空自輾愁腸！

### 鷓鴣天

維兵來鴻告彭君海濤以名花贈植璇固因感而賦

誰染一園春色濃，嬌花寵柳笑東風。却憐明日雙歸燕，舊棟翻疑是夢中。蝶意喜，蜜情融，千鍾不惜醉芳叢。高歌應頌彭君子，畫出人間錦繡宮。

### 臨江仙

潘君新熹精歷史好詩文酒海中也乙酉春邂逅於黔西因有同鄉之誼特賦此以贈

且賦離騷傾一醉，何年何處重逢？莫將幽恨怨絲桐，人間多少事，都在有無中。今日逢君身是客，明朝依舊萍踪。天涯同似去來鴻

，一江春水綠，倚檻笑東風。

又

莫向征塵溫舊夢，且聽杜宇啼紅。人生萬事轉頭空，請君歌一曲，  
情付酒杯中。半壁河山今已碎，中原烽火迷濛。長戈駿馬好凌空，  
相看頭未白，應許飲黃龍！

三

誰識潯陽江上客，少年志氣崢嶸。深閨無計請長纓，壯懷激烈處，  
半向早寒生。有幸今朝逢舊雨，詩思酒興豪情。他年聯袂上蓬瀛，  
江湖堪作蓋，一笑衆仙驚。

臨江仙

離恨已教頭髮白，那堪窗外瀟瀟。狂風佔盡世間豪，子規啼缺月，  
愁雨滴芭蕉。堪歎儒冠真自誤，人生幾度良宵？斷腸心事浙江潮，  
夢君君不覺，醒後更無聊。

### 臨江仙

邕江遇梁學長繼光喜其書法大進賦此以贈

曾記南園芳草地，青梅竹馬相親，晴窗洗硯兩忘形，月明花影下，  
一片詠吟聲。邂逅邕江逢舊雨，揮毫着紙堪驚，銀鈎鐵畫復懸針，  
籠鵝愧未備，斗酒慰離情。

### 臨江仙

與中大同學客次邕江抗戰勝利同仲慶祝即席而作

誰識飄零窗下客，一朝劫後重逢。喜來同唱大江東，相看頭未白，  
把手笑西風。更喜長天秋色好，青雲掩却殘虹。神州萬里起雄風

，蝦夷肝胆碎，一舞醉千鍾。

臨江仙

梁宗岱先生乃吾粵一代文豪乙酉秋同客桂西招飲寓中即席賦此

一笑荷風浮綠蟻，恰如蓬島仙逢。人間春色入絲桐，羨公閒似鶴，  
文彩古人風。酒興詩懷誰得似，青蓮活也難同。幾回抵掌論英雄，  
曹劉孫項事，畢竟付江東！

少年遊

徐君福海詩人也乙酉春同避難黔西安順承贈詩多首賦此奉呈

黔中四月尚宜春，鶯蝶舞衡門。瑞氣如蘭，凝章綴句，滌我一襟塵。  
。香爐高詠君家事，文彩近前人。風雨同舟，傾江當酒，聊表兩  
情真。

減字木蘭花

陳君哲豪乃南國才女邕江邂逅旋即別去以詩相贈賦此奉酬



萍蹤相聚，聚不多時還別去。何日重來，同把金樽此地開？怪他老柳，笑我無言頻點首。莫道多情，一曲新詞淚寫成。

阮郎歸

乙酉重陽賦寄維岳

風風雨雨重陽節，籬菊那堪折？問君何事年年別，塞外峰巒疊！雁已過，無邊月，錦書憑誰覓？怯憐瘦影如輕蝶，倚欄燈欲滅。

浣溪紗

斗酒狂吟一座驚，此身恰似白鷗輕，東西南北任縱橫。滿目江山誰是主，一襟熱淚夢中醒，五更心事恨難平。

好事近

大地已無多，又是傷春時節。惱煞撩人鸚鵡，向花前饒舌。誰憐

無路請長纓，忍聽鼓鼙咽？安得醉眠無夢，任西樓斜月！

### 南鄉子

花落不須悲，紅蕊明年又結枝。最怕少年頭易白，絲絲，獨倚危欄對夕暉。惱煞子規啼，苦問行人歸未歸。一枕悽涼家國夢，難支，瘴雨蠻煙不盡思。

### 點絳脣

爲陸萬園何婉蘭結婚而作

蝶舞鶯嬉，春風乍扇春容好。似春知道，燕爾佳辰到。共樂春臺，此日歌窈窕。同欣禱，鴛鴦不老，歲歲長歡笑。

### 浪淘沙

甲申秋海天兄來自桂林同醉數日回首漢皋感慨特甚時桂柳烽警賦此奉贈并誌鴻爪

節序忽驚秋，葉葉颼颼，相逢一笑看吳鉤。回首征塵多少恨，盡付

東流！ 醇酒換貂裘，不醉無休，酒仙詩客傲王侯。纔吐胸前舊塊壘，又惹新愁。

二

仗子賦良謀，落日登樓，萬家烽火正悲秋。半壁東南危亦甚，誰補金甌？ 心事幾時休，國恨悠悠，橫戈原不爲封侯。何日得磨十萬劍，征鬪同遊？

浪淘沙

甲申重陽節前一夕柳江左君志培招飲即席賦此

籬菊傲新霜，天淡雲黃，瀟瀟風雨鬥清狂。無數青山登不得，烽火茫茫。 肥蟹引蕤薑，新釀醇香，左君佐客傾詩囊。着意開筵拼一醉，明日重陽。

鷓鴣天

趙君少昂粵之畫家也癸未冬自桂返柳轉渝因有凹園同學之誼賦此以贈

記得當年汗漫遊，凹園花底弄詩籌。  
羨君彩筆生靈鳳，畫出丹青冠九洲。  
驚烽火，苦離愁，年年魂夢逐雲浮。  
今朝却喜離江水，萬里流來一舊鷗。

二

鴻雁人生不住飛，東西南北繫離絲。  
憐君瘦馬渝關道，又值秋風掠鬢時。  
雲縹緲，月依依，窺人贈遠折蘆枝。  
他年此景堪相憶，今夕何妨付酒卮？

點絳脣

相見空憐，許多心事難傳與。  
不如歸去，陣陣芭蕉雨。  
何事多情

，情似風飄絮。天涯路，恨絲愁緒，織就相思句。

虞美人

奉和清遊會會友陳寂先生

花香不怕春光老，自有春知道。杜鵑何必喚春回？贏得一襟清淚送春哀。早聞我佛從頭說，好與春緣絕。春來風雨惱人多，端的人間解悟有誰麼？

減字木蘭花

奉和清遊會會友陳寂先生

瀟瀟疎雨，小小黃花開滿路。一味驚秋，玉笛何人倚畫樓？亂山回眄，草木臃腫誰爲浣？我亦傷時，鸚鵡前頭莫與知。

卜算子

夜靜寄維岳次廣廈兄韻

擁月夢來遲，漏靜愁難靜。生怕羅衿料峭寒，風漾朱簾影。借酒

強愁眠，幽恨深重省。雁也依稀塞外來，淚熱人情冷。

點絳脣

廣廈兄題杜鵑次韻奉和

血湧心頭，淚痕點點凝珠露。滿林紅雨，幽恨憑誰訴？  
一掬深情，似被前緣誤。傷春事，人間何處，把酒長留住？

惜分飛

儲君問鵲江南才女也承贈詩數首丙戌夏余南行有感賦此惜別

荔子灣頭商滌著，忽作銷魂別處。君是多情雨，淚痕點點留人住。  
不恨相逢時已暮，恨我忽忽又去。握手更相覷，詩箋寫盡斷腸句。

臨江仙

丙戌重陽有感井示定勝定國二弟

羊城一夕無風雨，依然悶過重陽。枳籬開處菊花香，茱萸聊自插，  
痛惜雁分行？載酒江湖無一事，何曾着眼侯王？此生恰似白鷗翔

，浮家秋水闊，歸夢碧天長。

喝火令

丙戌中秋次廣厦兄韻

怕見中秋月，年年別恨生。不堪長醉不堪醒，腸斷閨中思婦，腸斷漢家營。誰爲吹蘆管，何來急暮砧？秋聲喚起萬般情，怎忍思他，怎忍卷簾聽？怎忍燒殘紅燭，怎忍寫悽清！

微塵吟草卷上



微塵吟草卷下目錄

五絕五首	.....	一
五律四首	.....	二
七絕一〇〇首	.....	三
七律六首	.....	三三
古體一首	.....	三五

微塵吟草卷下目錄

# 微塵吟草卷下

## 送別

此別會何日？擎杯淚欲傾。  
願將身化月，萬里伴君行！

## 春日

閒步小橋西，黃鶯恰恰啼。  
落花風雨後，草色滿前溪。

## 對鏡

晚來西風惡，臉上幾痕新。  
笑對菱花語：端詳認世人！

## 秋夜

風漾朱簾動，灣頭一片秋。  
蘆花爭月色，蟲笛破人愁。

偶成

人言吟詩瘦，我却詩吟肥。盡將愁與恨，一任遣詩痴。

傷別

空有懷人淚，燈前可奈何？一樽殘酒苦，孤館落花多。怕見樑間燕，羞聞子夜歌。堪憐英氣盡，身世總蹉跎！

端午書懷

湘西軍次

大好天中節，難銷家國愁。蛟龍爭角黍，風雨撼孤舟。擊楫人何在？平胡志未酬。一樽殘酒醒，起舞看吳鉤。

泛舟

青山灣軍次

江濤漲復漲，偷閑納晚涼。一帆荷葉艇，萬頃水雲鄉。漾去金波遠

，飄來細柳長。狂吟催落日，明月上橫塘。

### 何處春光好

何處春光好？春光處處多。戰雲迷宇宙，鼙鼓動風波。弱水帆難涉，移山志不磨。樓蘭行掃滅，預奏凱旋歌！

### 秋夜一絕

凭闌何事笑孱顏？貪看灣頭月色閑。蟲韻風傳秋意好，幾疑身置玉臺間。

### 重九

重九登高眼界新，西風颯颯拂衣巾。多情最是崖邊菊，爛漫繽紛笑向人。

雨後

驟雨初晴出畫樓，溪光如鏡屋如舟。  
偶然拾得梧桐葉，寫就新詩付水流。

閑居

半床錦褥半床書，起臥無時得自如。  
薄酒纔醒歌亦歇，倚欄閑對白芙蓉。

秋日

竹院蕭蕭午亦涼，紅蕖相對鬥新粧。  
鸚哥向我殷勤問，讀到關雎第幾章？

荔灣泛棹

荔子灣頭泛棹過，夕陽虎眼起紋波。殘蟬一陣垂楊裏，似和漁人歎  
乃歌。

### 窺月

團團古鏡長空掛，一片清光玉不如。最是空庭梧葉落，卷帘怕見影  
蕭疏。

### 即景

門前溪水碧悠悠，夾岸垂楊一色秋。欸乃櫓聲搖夢去，輕舟不肯載  
閒愁。

### 秋晨

夢迴小閣篆香銷，帘卷西風倍寂寥。曉色似爭蘆色白，冷情怕見艷

陽驕。

悶雨

整日瀟瀟秋雨頻，汀蘆岸蓼幾翻新。  
愁來欲向溪光照，生怕西風著  
摸人。

秋湖看月

一行鷗鷺避人驚，楊柳蕭疏野渡橫。  
獨上漁磯遙看月，波光如鏡照  
心清。

自遣

閒向漁磯理釣鈎，歸來買醉柳橋頭。  
眼前興廢休多管，一曲高歌起  
白鷗！



秋夜

溪光如鏡月如鉤，  
点点飛螢傍畫樓。  
最是拒霜能解意，  
向人含露醉清秋。

酒醒有感

更殘酒醒玉釵斜，  
人去樓空勝落花。  
好月好風和夢渺，  
冷蟲聲透綠窗紗。

與黃君寶璇夜話

畫閣重簷枕碧流，  
柳條繫住客行舟。  
西窗剪燭評棋局，  
風雨難銷一夜愁。

二

寒蟲戚戚夜漫漫，共剔銀燈熱淚彈。  
君亦木蘭奇女子，誓同磨劍斬樓蘭。

看菊

籬下疏疏菊影搖，一叢深淺最難描。  
陶公倦戀長爲醉，我亦同君話寂寥。

二

深春不綻綻深秋，偏愛清霜洗積愁。  
傲世何妨稱隱逸，斜陽冷圃自幽幽。

涼夜

茜紗窗外影離離，邀月同傾酒一卮。  
鴈信未歸人寂寞，此情惟有拒

霜知。

### 秋興

竹影飄蕭小院涼，蘭姨菊姊鬥芬芳。  
夢迴乍覺秋滋味，卷起湘帘對夕陽。

### 憶友

幽幽小閣篆煙微，魂夢無憑鴈影稀。  
斗酒不銷秋日恨，卷帘羞見菊花肥。

### 與任師啟珊遊西邨有感

重來人已似劉郎，袖裡猶攜菡萏香。  
紅紛碧筒銷未盡，半溪流光照斜陽。

二 廣雅書院外望

夾徑槐花萬點黃，灣灣碧水繞門牆。  
流風未改湖山舊，耐得滄桑五十霜。

三 士敏土廠

黑煙繚繞漫蒼空，卮漏能填是此自。  
但願長存貫天日，不驚狂雨不驚風！

四 某公館

蒼煙隱隱出紅牆，畫閣巍峨接大荒。  
莫道秦皇好奢侈，而今侯戶勝阿房。

冬遊

絲絲微雨馬蹄驕，鞍上騷人賦大招。一片江山寒色暮，梅花如雪淚如潮。

### 病中

病中心緒怯黃昏，寂寞深閨欲斷魂。窗外梧桐疏雨滴，輕衾移傍藥爐溫。

### 二

湘帘慵卷已連朝，舊恨新愁未易銷。鷗鳥不知人意冷，沙汀猶自弄新潮。

### 晨早採梅

殘粧未整出蘭房，爲愛冰魂一縷香。寒露霑泥鞋印重，翻嫌蜂蝶趁

人忙。

二

溪邊幾樹罨流霞，疎是枝條澹是花。  
騷客未來春已到，板橋西畔阿誰家。

憶西湖

廿三年當惠陽女子師範教席

記得當年汗漫遊，六如亭畔弄扁舟。  
朝雲暮冷花何似？湖月湖風又一秋！

二

湖畔飛鵝氣象雄，幾回痛哭弔哀鴻。  
劇憐一片丹楓樹，映出斜陽作血紅！

三

步月閒閒岸上過，  
鱉湖柳影弄清波。  
寺塔玉砌寒如水，  
隱隱鐘聲度隔河。

四

回思景色意偏幽，  
紅蓼青蘋洲外洲。  
贏得詩人翻異案，  
鉛華澹抹勝杭州。

夜看梅花

幾枝疎影卷寒溪，  
玉骨冰肌倚檻西。  
風月淒清誰作伴？  
笛聲驚起翠禽啼。

梅

雪壓風摧不住開，枝疎幹瘦亦道哉！澹粧不與夭桃比，自有清香出世才。

燈蛾

銀釭耿耿最相親，爲愛虛榮誤却身。自撥飛蛾還自笑，古來解悟有誰人？！

除夕

紛紛絃管鬧昇平，火樹銀花不夜城。爆竹未曾除舊恨，那堪新恨更環生！

瓶桃

洞裏移來瓶裏栽，迎春萬朶競相開。粉痕凝血緣何事？惹我花前繞



百迴。

春晨

橫塘十里曉寒新，楊柳青青已似春。  
露濕薔薇初日裏，倚欄低喚賣  
花人。

春日賞花

花底傾杯花影嬌，鶯聲柳外感魂銷。  
狂蜂浪蝶頻相妒，觸斷芳鬚落  
酒瓢。

春日旅行

藏霞洞

林木蕭疎古剎中，輕雲嫩日映青蔥。  
置身此地疑非世，靜聽泉流百  
慮空。

二 大雄殿下

殿下寒梅萬樹開，暗香浮動月華來。  
神仙若解憐春意，應許飛花入玉壘！

三 洗心潭

洗心亭畔洗心潭，樹影森森山影藍。  
昏水一瓢狂自飲，消除百慮舌餘甘。

四 飛來寺澄碧泉

碧水一池似鏡平，山光掩映倍澄明。  
世間萬象終歸濁，惟此泉流亘古清。

五 滙江泛棹

綠水青山足遣懷，春風一櫂把詩裁。  
漁翁欸欸憐騷客，捕得肥魚佐酒杯。

### 從化百丈飛瀑

銀河倒瀉成飛瀑，如此江山入畫圖。  
噴雪濺珠吹不散，煩襟一滌一塵無。

### 謝寶璇姊贈字

一字由來貴比金，銀鈎鐵畫倍堪欽。  
蓬廬有幸頻添色，愧乏籠鵝報子心。

### 春曉即景

春濃怯倚小欄干，一片嬌花帶露寒。  
飛過水田雙燕子，教人翻作雨

雙看。

春江泛棹

珠江江水碧如油，打槳嬉春古渡頭。  
脫口新歌紅豆曲，一行鷗鷺起沙洲。

有感

霏霏微雨欲成泥，日影如煙逐馬蹄。  
惱煞行人行不得，落花多處鷓鴣啼。

與諸友遊羅浮

風馳電掣復雷鳴，萬樹千山競送迎。  
知有鮑姑雲裏笑，落花呼出鷓鴣聲。

二 夜宿明遠樓

鳥道猿梯路百盤，樓臺高處不勝寒。老人峰上團圓月，遙掛青松作鏡看。

三 華首臺

盤空華首白雲飛，此日鐘聲似昨非。悽絕斜陽殘跡在，相尋流水浣征衣。

四 登撥雲絕頂

笠影聯翩上翠微，春風帶露灑征衣。層雲礙路憑誰撥？且立峯頭悟妙機！

五 冲虛觀送別

客中送客難爲別，愁裡添愁倍覺痴。  
野寺鐘聲催急雨，目窮車影立  
多時。

即景 時避險於紫金最坑村

蟬聲何處曳高枝？樓小窗虛透日遲。  
眠睡時多行坐少，昏燈一卷子  
才詩。

無題 豫北軍次

城樓暮鼓催殘日，沉醉沙場賦此詩。  
把劍渾忘飄泊恨，人生幾度立  
功時！

即景 廿八年四月一日青山灣軍次

漫漫長夜一燈昏，銷盡如絲幾縷魂？  
屋漏移床飢鼠跳，狂風和雨打

柴門。

### 月夜泛舟

忽驚衣帶近來寬，鼓櫂臨風夜氣寒。  
烽火淒迷湖上月，沙場沉醉幾  
回看？！

### 桃花洞夜遊有感

百折迴環一洞天，不知今夕是何年。  
携樽欲問秦時事，流水桃花亦  
惘然。

### 二

晚霞似錦一通津，夾岸芳英眼底新。  
欲繼漁人來借問，可能容我避  
胡塵？

答鄉人問訊

自上桃花源上路，愛眠貪醉喜吟詩。  
欲將此意憑雙鯉，報與茶陽風月知。

偶成

懶拈拙筆書閑事，一擢隨風逐渺波。  
兩岸蘆花吟不盡，鷗光帆影起婆娑。

重遊青山灣

青山灣上一重遊，鳥樹雲煙舊侶儔。  
底事年來未消瘦？吟詩偏解破人愁。

題千秋喜鵲紅梅圖



枝頭喜鵲自徘徊，驚噪姮娥化杏腮。一縷暗香魂欲絕，霜風吹酒上顏來。

### 驛中題壁

巾英豪志幾時成！別母離夫至此行。杯酒不堪窮裡問，遣懷惟有讀書聲！

### 與維岳玩月

蟲聲陣陣透窗紗，語至嬌羞鈿影斜。猛覺兔兒雲裏出，人間偷看並頭花。

### 二

秋風曳樹散冰寒，爲愛嫦娥仔細看。躑躅花陰嬌不勝，倩郎權作玉

欄干。

漫興

紫薇花下記痴狂，百鳥聲聲噪夕陽。  
夫婿怕儂生暮感，坐懷特地畫眉長。

送別維岳

一夜悽悽未聽敢，傷春惜別杜鵑聲。  
庭前紅紫都憔悴，恨煞垂楊不縮人！

二

金屋蕭蕭自剔燈，思量無計阻征鞍。  
今朝魂逐輪蹄去，特地爲君護客寒。

洞庭舟次

幽幽湖鳥喚羣聲，似是離人惜別情。  
默禱迴瀾多着力，樓船得教轉西行！

寄外

春未來時君已去，花開那識得歸無？  
五更起坐魂銷盡，其奈聲聲泣夜鳥！

二

苦恨無由伴遠行，夢中驚起馬嘶聲。  
分明小別還惆悵，却笑春蠶自縛情。

三

浮生聚散苦情多，三載纏綿奈汝何。  
此去花朝明月夜，與誰同唱採菱歌？！

四

密意穠情仔細尋，素書遙寄且沉吟。  
憑君珍重憐花意，孌娜柔條怕冷侵。

五

芭蕉瑟瑟雁聲低，一片蕭疎意欲迷。  
兩地鴛鴦今夜冷，不堪重上小樓西！

六

枝上黃鶯一曲歌，教人慵起畫雙蛾。  
夢中唱盡銷魂句，醒後翻添別

恨多！

七

不堪錦字問征夫，可有相思似妾無？一日九迴腸斷盡，夢中猶自倩郎扶。

八

悔教夫婿覓封侯，羞畫娥眉懶上樓。縱使柳條無艷色，江楓如錦不勝愁！

惜別

民卅一年春余由柳赴邕因寄維岳

匆匆上馬太瑯璫，不聽驪歌也斷腸。今夜夢魂何處去？莫將苦况報檀郎。

二

客裏怕聞驟夜雨，那堪窗外有芭蕉！  
聲聲滴入愁人夢，夢亦離君更  
寂寥！

三

西風一夜剪芭蕉，心似錢塘八月潮。  
八月潮生潮復落，離人苦憶未能銷。

四

好夢生憎鷄報曉，衿寒怕見月光斜。  
蟲吟未盡相思苦，雁斷衡陽泣  
暮笳。

五

菊黃楓紫謝深秋，帘幕生羞上玉鉤。但願夢君君見我，兩情繾綣不相休！

六

聲聲腊鼓逼殘年，一顆歸心百紉牽。今夜若教身作月，應將密意照君前！

別柳江西遷有感

甲申冬月桂柳烽警家人避難大煌江口維岳警備柳江旋獨西行

八桂煙塵眼底生，縱橫敵騎逼孤城。此身願繼梁紅玉，插鼓軍中破賊營！

二

國破家亡鬢漸皤，蕭條行篋似頭陀。芒鞋踏碎千山雪，那識愁人涕

淚多！

三

荒煙四合望迷津，瑟瑟輪蹄响未停。  
大地似憐行脚苦，特教風雨作  
哀聲。

四

拋雛別母更離夫，來作空山泣夜烏。  
一本離騷吟不盡，挑燈和淚看  
輿圖。

五

八桂名城亦壯哉，誰教胡馬動風雷？  
可憐萬里黔南路，盡是啼鴉帶  
血來！



六

覆巢飛燕遍山河，壯士何心泣楚歌？恨我未能如寶劍，長隨夫婿斬妖魔！

詠瓶梅并寄維岳

一枝疏玉傍粧臺，粉臉撩人故故開。客裏相逢權作伴，無勞夫婿妒他來。

寄維岳

壬午冬維岳以自來水筆鉛筆各一相題寄此用誌不忘

誰將彤管合鴛鴦？萬里傳來用意長。應是姮娥留指爪，與儂描繪紫薇郎！

二

張敞當年憑此筆，描成佳話古今傳。我來重寫同心字，留與人間帶笑看。

維岳相遇安順翌日即赴百色

重逢戰後一傾杯，乍合仍離倍可哀。此去春風揮劍影，憑君馬上把詩裁。

二

貔貅十萬率雄師，應是囚車繫虜兒。他日燕然欣返旆，並肩同詠凱旋詩。

紅豆一握維岳寄自百色賦此以酬

青鳥飛來正早春，口銜紅豆斷人魂。不知誰授殷勤意？特向東君仔細

細詢。

題小照寄維岳

年年歲歲花相似，歲歲年年人不同。  
小影寄來無別意，倩郎攔住好春風！

大風雨感作

晴空霹靂雨瀟瀟，憑盡長欄賦大招。  
忍看景物年華改？肯讓中原虎豹驕？  
殺敵刀光明似雪，憂時熱血湧如潮。  
四萬萬人同躍馬，櫻花踏碎二重橋！

聞洪都失陷

潯陽江上陣雲遮，日落洪都咽暮笳。  
戰士爭鋒傾熱血，將軍失策走

輕車·已看勝地成焦土，忍聽殘黎泣故家？安得橫磨十萬劍，長驅  
三島踏櫻花！

感懷

滿江春水萬重波，未似家愁國恨多。無語新亭皆血淚，覆巢飛燕遍  
山河。漫云滄海塵難掩，自有雄心劫不磨。舞劍莫辭傾一醉，臨風  
何必獨悲歌？！

冬日書懷同勉維岳

安順旅次

猶是胡塵遍九洲，金甌殘缺怯登樓。幾回淚向干戈洒，到處情同草  
木愁。劍俠知君憐作客，柳絲牽我怨封侯。山城日落三冬暮，又見  
菱花笑白頭。

二

卅八無聞祇暗悲，歲寒徒具雪松姿。自慚幼未嫺弓劍，那得長隨射  
虜兒。詩酒生涯原不奈，鬚眉志氣可堪期？千金願覓丹青手，爲寫  
中原躍馬時！

甲申除夕有感

爆竹無聲畫角哀，除夕安順  
禁放爆竹悽涼除夕起徘徊。桃符異地驚新樣，樽酒  
經年憶舊醅。北閭萱花何處望？西樓鴈字幾時回？板輿倘遂相迎養  
，願學慈烏返哺來！

從軍行

政府徵兵事八方，壯男壯女列戎行。曉度關山隨鐵騎，夜聞羌笛咽

微塵吟草 卷下

三六

瀟湘。瀟湘激灑倭奴血，鬼哭神號魂斷絕。可憐賊骨無人收，腥風捲起驚啼鴉。憶昔離家話別時，姊贈金刀弟贈衣。爹娘十里親相送，情自纏綿意自痴！別來身世說如何？醉臥沙場尚枕戈。雪耻復仇心正切，撼天一片木蘭歌！

中華民國三十六年元旦初版

微塵吟草一冊

每冊實價國幣壹仟元

外埠酌加運費滙費

作者：陳璇珍

發行：友聲出版社

承印：蔚興印刷場

代售：各大書局



廣州教育路十五號

蔚興印刷場

電話一一六一十